

Allannguutissatut siunnersuut

uunga

Siunnersuut uunga: Erngup nukingata innaallagissiornermut atorneqartarnera pillugu Inatsisartut inatsisaat nr. x, x. [qaammat] 2014-imeersoq

Inuussutissarsiornermut Ataatsimiititaliap isumaliutissiissutaa tunngavigalugu aappasaanneerinissamut Naalakkersuisunit saqqummiunneqartoq.

§ 7-imut

1. I § 7, *imm. 3-mi* ”60” imatut allanngortinneqassaaq: ”40”.

§ 11-mut

2. § 11, *imm. 5* imatut oqaasertalerneqassaaq:

”*Imm. 5.* Pisinnaatitaaffimmik pigisaqartup sulisartunik nunaqavissunik atuinissaa pillugu akuersissummut atugassarititaasunik aalajangersakkanillu Naalakkersuisut aalajangersaassapput. Taamaattoq suliffeqarfiup pisariaqartitsinera tunngavigalugu sulisussanik piginnaaneqartunik Kalaallit Nunaanni pissaqartoqartinnagu, pisinnaatitaaffimmik pigisaqartoq sulisussanik, Kalaallit Nunaata saniatigut sumiiffinnit allaaneersunik atuisinnaavoq.

Suliassani, pilersuinerni kiffartuussinernilu nunaqavissut suliffeqarfiutaannik pisinnaatitaaffimmik pigisaqartup atuinissaa pillugu Naalakkersuisut akuersissummut atugassarititaasunik aalajangersakkanilu aalajangersaassapput. Taamaattoq nunaqavissut suliffeqarfiutaat teknikkikkut niuernikkulluunniit unammillersinnaassuseqanngippata suliffeqarfiit allat atorneqarsinnaapput.”

§ 12-imut

3. § 12-*imi imm. 2-p* kingorna immikkoortutut nutaatut una ikkunneqassaaq:

”*Imm. 3.* Suliassap piviusunngortinnissaanut mianerisassat immikkorluinnaq ittut pisariaqartilerpasuk, Naalakkersuisut *imm. 2* naapertorlugu sivitsuinerup saniatigut atugassarititaasussatut aalajangersarneqartut naammassineqarsimappata piffissaq akuersissuteqarfiusoq ukiunik 20-nik sivitsoqqissinnaavaat.”

Taamatuma kingorna *imm. 3-4 imm. 4-5*-inngussapput.

§ 18-imut

4. § 18 imatut oqaasertalerneqassaaq:

”§ 18. Misissueqqaarnissamut imaluunniit atuinissamut akuersissuteqartoqannginnerani tusarniaasoqarsimassaaq. Tusarniaanermi ilaatinneqassapput:

- 1) Kikkulluunniit suliap inernissaanut ataasiakkaarlutik annertuumillu soqutigisaqartut.
- 2) Sulisitsisut kattuffii aamma sulisartut kattuffii, kiisalu Kalaallit Nunaanni peqatigiiffiit kattuffiillu, malittarisassatik malillugit inuiaqatigiinni piujuartitsisussamik iluaqutaasumik sunniuteqartitsinissamut, avatangiisinik illersuinissamut imaluunniit inuit pisinnaatitaaffiitut tunngatillugu annertuunik soqutigisaqartut.
- 3) Kommunit oqartussaasullu kallarneqartussat.

Imm. 2. Naalakkersuisut sivikinnerpaamik sapaatit akunnerini arfinilinni tusarniaanermi akissuteqarnissamut piffissaqartitsinissamik aalajangersaassapput.”

Allannguutissatut siunnersuummut nassuiaatit

Nassuiaatit nalinginnaasut

Inuussutissarsiornermut Ataatsimiititaliaq 25. maj 2014-imi Erngup nukingata innaallagissiornermut atorneqartarnera pillugu Inatsisartut inatsisissaattut siunnersuummut isumaliutissiissuteqarpoq. Inuussutissarsiornermut Ataatsimiititaliami amerlanerussuteqartut allannguutissatut siunnersuummik saqqummiussisoqassappat, inatsisissatut siunnersuut akuerineqassasoq inassuteqarput.

Allannguutissatut siunnersuummi Inuussutissarsiornermut Ataatsimiititaliap allannguutissatut siunnersuutip kissaatigisaata ilanngunneqarnissaa siunertarineqarpoq.

Inuussutissarsiornermut Ataatsimiititaliap isumaqatigiissup kissaatigaa, atuinissamut akuersissutit piffissaq atuuffissaat ukiunit 60-init siunnersuutigineqartuniit ukiunut 40-nut sivikillineqassasoq, ukiunik 20-nik sivitsuinissamut periarfissaqartitsiviulluni. Allannguutissatut siunnersuut atuinissamut akuersissutip atuuffiata ukiunut 40-nut sivikillineqarnissaanik, aammalu sivitsuinissamut periarfissamik allangortinneqanngitsumik imaqarpoq.

Ataatsimiititaliami amerlanerussuteqartut oqaatigaat, atugassarititaasut immikkoorluinnaq ittut atuutissappata, ukiunik 20-nik sivitsueqqissinnaanermut periarfissiisoqarnissaa tunuarsimaarfiginagu. Aalajangersakkamik nutaamik, suliassap piviusunngortinneqarsinnaaneranut tamanna pingaaruteqarpat, atuinissamut akuersissutit ukiut 20-t tikillugit sivitsoqqissinnaanissaannut periarfissiisumik ilanngussisoqarnissaa siunnersuutigineqarpoq.

Atuinissamut akuersissutip atuuffissaa tamarmiuseroq, tassungalu ilanngullugit sivitsuinerit ukiunit 80-init sivilisnerusinnaangilaq.

Allannguutissatut siunnersuummi erseqqissarneqarpoq, ajornartinnagu pisinnaatitaaffimmik pigisaqartup sulisunik nunaqavissunik aamma nunaqavissut suliffeqarfiutaannik qanoq amerlatigisunik atuisarnissaanik Naalakkersuisut aalajangersaasussaasut. Aalajangersakkami pisinnaatitaaffimmik pigisaqartup sulisussanik nunaqavissunik aamma nunaqavissut suliffeqarfiutaanik annertunerpaamik atuinissaata siuarsarneqarnissaa siunertarineqarpoq.

Allannguutissatut siunnersuummi misissueqqaarnissamut akuersissuteqarnissaq aamma atuinissamut akuersissuteqarnissaq sioqqullugu Naalakkersuisut annertuumik tusarniaanissamut pisussaaffeqarnerat aalajangersarneqarpoq.

Aamma piffissaq tusarniaaffiusussaq sapaatit akunnerinut arfinilinnut sivitsorneqarpoq, maannakkut sapaatit akunnerinut sisamaasunut taarsiullugu.

Allannguutissatut siunnersuummi aalajangersakkanut ataasiakkaanut nassuiaatit

Nr. 1-imut.

Atuinissamut akuersissut siulleg ukiut 40-t sinnerlugit sivilisussuseqarsinnaangitsoq aalajangersakkami aalajangersarneqarpoq.

Nr. 2-mut.

Pisinnaatitaaffimmik pigisaqartup sulisunik nunaqavissunik aamma nunaqavissut suliffeqarfiutaannik qanoq annertutigisumik atuinissaanut Naalakkersuisut aalajangersakkanik aamma akuersissummut atugassarititaasunik aalajangersaasussaanagerat aalajangersakkami aalajangersarneqarpoq. Oqaatsimi ”aalajangersakkanik aalajangersaasussaapput” erseqqissarneqarpoq, Naalakkersuisut aalajangersakkani, akuersissutinut malitassiani aamma akuersissummut atugassarititaasuni tamanna pillugu aalajangersaasasut.

Taamaattoq sulisussat nunaqavissut naammattut imaluunniit pisariaqartinneqartunik piginnaanillit pigineqanngippata, pisinnaatitaaffimmik pigisaqartoq nunanit allaniit sulisussanik atuisinnaavoq. Taamatuttaaq nunaqavissut suliffeqarfiutaat teknikkikkut niuernikkulluunniit unamillersinnaassuseqanngippata, suliffeqarfiit nunanit allaneersut atorneqarsinnaapput.

Nr. 3-mut.

Aalajangersakkami siunnersuutigineqartumi Naalakkersuisut pisuni immikkut ittuni atuinissamut akuersissutip sivitsorneqarsinnaanageranik pisinnaatitaaffimmik pigisaqartumut akuersissuteqarsinnaanagerat periarfissinneqarpoq.

Tamatuma kingunerisaanik pisinaatitaaffimmik pigisaqartoq marloriarluni malittunik, tamarmik immikkut ukiut 20-t tikillugit sivisussusilinnik sivitsuisinnaavoq. Taamatut sivitsuinissamik qinigassiinermi, suliap piviusunngortinneqarsinnaaneranut taamatut qinigassaqaarnerup pisariaqarluinnarneranut uppersaatissaqarnissaq akuersissuteqarnissamut piumasqaataavoq.

Tamatuma kingorna aalajangersakkami imm. 3 imm. 4-nngorpoq. Tamatumalu kingorna imm. 4 imm. 5-inngorpoq.

Nr. 4-mut.

Imm. 1-imut.

Nr. 1-3-mi taaneqartunut tusarniaasoqartussaasoq aalajangersakkami erseqqissarneqarpoq. Aalajangersakkami tusarniaaffissat taaneqartut tusarniaaffissanut, suliniutinut angisuunut inatsimmi aalajangersarneqartunut assingusunngorlugit aalajangersarneqarput.

Imm. 2-mut.

Piffissaq tusarniaaffiusoq sapaatit akunnerinit arfinilinnit sivikinnerussanngilaq.